

INUIT ATAQATIGIIT

Inatsisartuni



13. december 2018

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

Naalakkersuisunut apeqquq:

- 1. Qarmasissiaq nunanit allanit pissarsiarineqartartoq qanoq annertutigisooq nunatsinnut tikisinneqartarpa? Aningaasannorlugu tamanna qanoq naleqarpa?**
- 2. Nunatsinni illuliornermi qarmasissiaq qanoq annertutigisumik atugaatigiva?**
- 3. Qarmasissiamik illuliaq qisummik illuliamut sanilliullugu qanoq annertutigisumik sipaarutaasinnaanera misissuiffigineqarsimava?**
- 4. Qarmasissiamik illuliat issittumi avatangiisinut naleqqussusaat ilisimatusarnikkut misissuiffigineqarsimappat?**
- 5. Nunatta pissarititai atorlugit qarmasissialiornermik misileraasoqarsimava? Ass. Kangerlussuup marraa?**
- 6. 2015-imi Kommune Kujallermi Inuussutissarsiornermut, Suliffeqarnermut, Niuernermut Nunanullu Allanut Naalakkersuisooq Vittus Qujaukitsoq aamma Kommune Kujallermi borgmesteri Jørgen Wæver Johansen, kiisalu Inuussutissarsiornermut Suliffeqarnermullu Ataatsimiititaliami ilaasortat ulluni marlunni Kujataani suliffeqartitsinerup annertusarsinnaanera pillugu isumasioqatigiissimapput. Tamanna Namminersorlutik Oqartussat nittartagaanni uani atuarneqarsinnaavoq:
https://naalakkersuisut.gl/kl-GL/Naalakkersuisut/Pisut/2015/08/170815_byggematerialer**

-Isumasioqatigiittoqareernerata kingorna suliniut Siku Block pillugu qanoq ingerlariaqqittoqarsimanersoq Naalakkersuisut annertunerusumik paasissutissiisinnappat?

- 7. Nunatsinni nunap immikkoortuini qarmasissiamik pilersuinissamut periarfissagissaartunik misissuisoqarsimava?**
- 8. Nunatsinni qarmasissialiorfimmik pilersitsinissamut Naalakkersuisut pilersaaruteqarpat?**
- 9. Nunatsinni qarmasissialiorfimmik pilersitsisoqassappat, tamanna qanoq annertutigisumik aningaasanik naleqassava?**
- 10. Nunatsinni qarmasissialiorfimmik pilersitsinikkut suliffiusinnaasut suut qanorlu amerlatigisut pilersinneqarsinnaappat? Qarmasissialiorfimmi sulisorineqartussat qanoq ilinniagallit pisariaqartinneqassappat?**

11. Sanaartornerup iluani nunatta avataaniit pilersorneqara annikillisarniarlugu Naalakkersuisut qanoq pilersaaruteqarpat?

(Inatsisartunut ilaasortaq Aqqa Samuelsen, Inuit Ataqtigiit)

Tunnngavilersuut:

Nunatta avataaniit pilersorneqarnera ukiuni aggersuni annikillisarneqassappat nunatta pissarititai tunniussinnaasaalu atorluarneqarnerusariaqarput. Qarmasissiaq nunatta avataaniit pissarsiarisartagarput qanoq annertutiginersoq paasisaqarfigissallugu pissutissaqarluarpugut, aammalu qarmasissiamik avataaniit pilersorneqarnitta Nunatta qanoq annertutigisumik aningaasartuutigisarneraa paasisaqarfigissallugu soqutiginaateqarluni.

Ullutsinni illuloriaaseq eqqarsaatigalugu qarmasissiamik illuliat qisummik illulianut sanilliullugit kiassarneq aserfallatsaaliinerlu eqqarsaatigalugit sipaarutaasinnaanerat paasisaqarfigerusunnarpoq. Qarmasissiamik illumik sananermi qularnanngitsumik sanaartornerani aningaasartuutit qaffasinnerusinnaapput, siunissarli ungasinnerusoq isigalugu sipaarutaasinnaanera ilisimassallugu pingaaruteqarpoq.

Suliniut Siku Block ukiut siuliini saqqumilaarsimaqisoq tammariartortutut tusarsaavallaarunnaariartortutullu isikkoqarpoq. Taamaattoqassappat soorunalimi uggornassoq.

Sanaartornerup iluani nunatta avataaniit pilersorneqarnera annikillisaaffigineqassappat qarmasissiaq periarfissaalluartut ilagisinnaagaat isumaqarpunga. Qarmasissialiorfimmik pilersitsinikkut Nunatsinni immitsinnut pilersornerulernissarput aammalu suliffissanik aalaakkaasunik pilersisoqarsinnaanera toqqammavissilluarneqassaaq. Taamaattumik nunatta avataaniit pilersorneqarnera annikillisaaffiginiarlugu Naalakkersuisut qanoq pilersaaruteqarnerisut paasisaqarfigissallugu pingaaruteqarpoq.